



本著作以創用CC「姓名標示-非商業性-禁止改作」4.0國際授權條款釋出。  
詳細授權條款，請至 <http://creativecommons.org/licenses/by-nc-nd/4.0/>。  
資料來源：教育部電子報「閱讀趣聞客語」專欄 <http://epaper.edu.tw>。

閩／懷想／☆☆☆★

## 溫泉鄉的頭幫車

因為工作上的需要，隔轉日早起時九點半進前，著愛趕到開會的地點。若是無欲家已駛車，唯一的方法就是到豐原客運車頭，坐往谷關的頭幫公車。

掠準講，拜五早起時六點四十分的头幫公車，定著無佬濟人會來坐，我穩心仔先到對面的便利商店，買一杯咖啡恰一塊麪。這個時陣，擰頭看見壁堵頂的時鐘挂好是六點三十分，以我的速度用三分鐘行到對面坐車猶赴赴赴，按算坐起去車頂才來食早頓。

無疑悟，遠遠就看著一陣人排甲 lò-lò 長，倚近共看較詳細咧，逐家的行李閣不止仔相嚮——攏是尻脊骹揸一个『kha-báng』，欲坐這幫往谷關的头幫車。閣較心適的是，來坐這幫車的人毋是學生囡仔，嘛毋是食頭路的人，大部份攏是有歲的老大人。

我當咧欣賞這個難得的光景，真緊，車來矣！眾人趕緊上車。

「是啥人的『kha-báng』？按怎揸佇塗跤？」一个阿伯先喝聲。

這陣人袂輪訓練好勢，對車跤到車頂，自動一个傳过一个：「是啥人的『kha-báng』？按怎揸佇塗跤？」。

「啊！莫怪對便所出來，感覺肩胛頭齊輕鬆，就是『kha-báng』袂記得揸啦！」一个阿桑緊對車頂衝落來，共『kha-báng』揸起去車頂。

「噯！你這跤若提無著，這聲你就愛翻頭囉！」

「嘿，就免浸囉！」

規車二、三十人，鬥鬥咧欲倚兩千歲，親像幼稚園的小朋友嘻嘻嘩嘩，原來是歡喜欲去浸溫泉。新式無障礙低地板公車的位無濟，有的人愛用倚的。這個時陣，逐家自動按照年歲來讓位，六十歲讓予七十歲；五十歲讓予六十歲。就按呢，我這個頭毛白陪白陪，平常時仔攏予人讓位的『美魔女』，煞變成上少歲的『資深美少女』，只好主動成做車頂頭一號倚票。

沿路猶閣有幾若个老大人上車，毋管是有熟似抑是外地客，逐家攏會當相讓位、鬥扶持。

開會的地點是溫泉鄉的前一站，車欲倚站的時，規車的人攏齊提醒我：「小姐，到站囉！再會！」

溫泉鄉的头幫車，予我看著臺灣上蓋嬌的風景——人情味。

作者：劉孟宜

### ☆詞彙學習☆

【隔轉日】keh-tng-jit/keh-tng-lit：翌日、次日。

【定著】tiānn-tiòh：一定。

【穩心仔】ún-sim-á：安心。

【壁堵】piah-tóo：牆壁。

【無疑悟】bô-gî-ngōo：不料、想不到。

【尻脊骹】kha-tsiah-phiann：背部。

【揸】hiat：丟棄、亂扔。

【揸】kuānn：提、拿。

【嘻嘻嘩嘩】hi-hi-huā-huā：嬉鬧、喧嘩。